



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 25, datë 14.05.2018

**PËR PËRFUNDIMIN E PROCEDURËS SË VERIFIKIMIT TË KANDIDATURËS SË ZOTIT
THEODHORI SOLLAKU PËR SHKAK TË TËRHEQJES NGA KANDIDIMI PËR VENDIN
VAKANT PËR GJYQATAR NË GJYKATËN KUSHTETUESE, SHPALLUR NGA
PRESIDENTI I REPUBLIKËS NË DATËN 07.02.2018**

Këshilli i Emërimeve në Drejtësi, i përbërë nga:

Ardian Dvorani	- Kryetar
Arta Marku	- Anëtare /Relatore
Fatri Islamaj	- Anëtar
Margarita Buhali	- Anëtare
Eriol Roshi	- Anëtar

Asistuar nga sekretare **Ermelinda Kadiu**,

Me praninë e Avokates së Popullit, **zonjës Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **zotit Bledar Dervishaj**, përfaqësuesit i autorizuar i Presidentit të Republikës,

në mbledhjen e datës **14.05.2019**, mori në shqyrtim çështjen që i përket:

**KANDIDADI PËR GJYQATAR
NË GJYKATËN KUSHTETUESE:**

Zoti THEODHORI SOLLAKU

OBJEKTI:

Urdhërimi i lejimit ose ndalimit të kandidimit të zotit Theodhori Sollaku, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018.

KËSHILLI I EMËRIMEVE NË DREJTËSI

Pasi dëgjoi relatimin e anëtares së Këshillit, zonjës Arta Marku, mendimin e paraqitur nga Avokati i Popullit, zonja Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

I. Rrethanat e çështjes

1. Në zbatim të nenit 125 të Kushtetutës dhe të pikës 1 të nenit 7/b të Ligjit nr. 8577/2000 “Për organizimin dhe funksionimin e Gjykatës Kushtetuese në Republikën e Shqipërisë”, Presidenti i Republikës, në datën 07.02.2018, ka shpallur hapjen e procedurës së aplikimeve për plotësimin e vendit vakant të krijuar në Gjykatën Kushtetuese pas mbarimit të mandatit të ish-gjyqtarit Sokol Berberi.

2. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000.

3. Ndërmjet kandidatëve që kanë shprehur interesin për plotësimin e këtij vendi vakant të krijuar në Gjykatën Kushtetuese është edhe zoti Theodhori Sollaku.

4. Në zbatim të nenit 125 dhe 149/d të Kushtetutës, të pikës 2 të nenit 7/b të ligjit nr. 8577/2000, të nenit 229, 235 e vijues të Ligjit nr. 115/2016 “Për organet e qeverisjes së sistemit të drejtësisë”, si edhe të pikës 98 të aktit nënligjor normativ, Vendimi i Këshillit të Emërimeve në Drejtësi me nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi, në mbledhjen e zhvilluar në datën 05.04.2019, vendosi fillimin e procedurave të verifikimit, vlerësimit, pikëzimit dhe renditjes të kandidatëve që kanë shprehur interesin për vendet vakante të krijuara në Gjykatën Kushtetuese.

5. Në zbatim të nenit 228 të Ligjit nr. 115/2016 dhe të pikave 5, 27 deri 37 dhe 41 të aktit nënligjor normativ, Vendimit të Këshillit të Emërimeve në Drejtësi nr. 2 datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, si edhe të pikës 4 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, në të njëjtën ditë të mbledhjes së zhvilluar në datën 05.04.2019, është realizuar edhe procedura për caktimin me short manual të relatorëve për secilin nga vendet vakante të krijuara në Gjykatën Kushtetuese dhe për Inspektor i Lartë i Drejtësisë.

6. Sipas rezultatit të shortit manual të realizuar nga Këshilli i Emërimeve në Drejtësi, lidhur me vendin vakant në Gjykatën Kushtetuese, të shpallur nga Presidenti i Republikës në datën 07.02.2018, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, zonja Arta Marku.

7. Zoti Theodhori Sollaku, si njëri ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi me nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, është njoftuar me shkrim për tu paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike në adresën e deklaruar nga vetë kandidati Theodhori Sollaku, gjendet e administruar në dosjes e kandidimit.

8. Në datën 08.04.2019, kandidati Theodhori Sollaku është paraqitur pranë Këshillit të Emërimeve në Drejtësi dhe është pajisur me formularët e deklaramit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit të Deklaratës përkatëse, e cila gjendet e administruar në dosjen kandidimit.

9. Në datën 17.04.2019, kandidati zoti Theodhori Sollaku ka depozituar në sekretarinë e Këshillit të Emërimeve në Drejtësi formularë të deklaramit dhe autorizime përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidimit.

10. Për llogaritjen dhe ndjekjen e zbatimit të afatit të parashikuar në pikën 2 të nenit 235 të Ligjit nr. 115/2016, si edhe në zbatim të pikës 60 të Vendimit të Këshillit të Emërimeve në Drejtësi me nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr. 265 prot, datë 19.04.2019, Këshilli i ka dërguar ILDKPKI-së listën e kandidatëve dhe personave të lidhur me ta që i nënshtrohen procedurës së verifikimit të kushteve dhe kriterëve të tjera ligjore të kandidimit sipas Ligjit nr. 8577/2000 dhe Ligjit nr.115/2016.

11. Bashkëlidhur kësaj shkrese drejtuar ILDKPKI-së, ndërmjet të tjerave, është vendosur edhe Deklarata e nënshkruar nga kandidati Theodhori Sollaku, ku tregohet se është pajisur me formularët e deklaramit dhe autorizimet që duhet të plotësohen për qëllimet e procedurës së verifikimit të kandidaturës së tij, si edhe data e nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës. Sipas kësaj Deklarate, rezulton se kandidati Theodhori Sollaku është paraqitur pranë zyrës së Këshillit të Emërimeve në Drejtësi dhe e ka nënshkruar atë në datën 08.04.2019.

12. Me shkresën nr. 2854/4 prot, datë 03.05.2019, ILDKPKI ka informuar Këshillin e Emërimeve në Drejtësi se kandidati Theodhori Sollaku nuk e ka përmbushur detyrimin e përcaktuar nga pika 2 e nenit 235 të Ligjit nr. 115/2016 për të dorëzuar të plotësuar pranë atij institucioni Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë. Sipas ILDKPKI afati 15 ditor për dorëzimin e plotësuar të Deklaratës së pasurisë ka qenë data 23.04.2019.

13. Në zbatim të pikës 26 të Vendimit nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, anëtari i Këshillit relator për ndjekjen e procedurave të vendit vakant, në datën 03.05.2019, ka njoftuar kandidatin Theodhori Sollaku mbi të drejtën e tij për të paraqitur, me shkrim, brenda datës 07.05.2019, drejtpërdrejt pranë zyrës së posaçme të Këshillit në Gjykatën e Lartë ose në rrugë elektronike, qëndrimin dhe shpjegimet përkatëse lidhur me këtë gjetje të procedurës së verifikimit, si edhe dokumentacion mbështetës të nevojshëm sipas vlerësimit të tij. Njëkohësisht, bashkë me njoftimin i janë dërguar për tu njohur edhe kopje elektronike të akteve të sipërcituara në këtë vendim.

14. Kandidati Theodhori Sollaku, në datën 04.05.2019, ka dërguar në rrugë elektronike shpjegimet e tij me shkrim lidhur me gjetjet e njoftuara të procedurës së verifikimit për sa i përket kontrollit të pasurisë.

15. Në thelb, në shpjegimet e tij, kandidati Theodhori Sollaku, parashtroi se:

Së pari: ka patur ngatërresë në lidhje me datën e fillimit të afatit 15 ditor, kandidati pretendon se ka marrë të mirëqenë datën 17.04.2019 si datë të fillimit të afatit e për rrjedhojë afati i dorëzimit përfundonte në datë 02.05.2019, nga ana e tij është dorëzuar nëpërmjet shërbimit postar në datë 30.04.2019 (pasi marrja e deklaramentit i ishte refuzuar nga ana e ILDKPI-së).

Së dyti: Nga përcaktimet kushtetuese (Neni D i Aneksit të Kushtetutës, pika 5), ligji nr. 115/2016 në asnjë rresht të tij nuk përmend pasojën se në rast të mos respektimit të afatit të vendosur për dorëzimin e dokumentave kandidati s'kualifikohet nga gara. Pra, afatet e përmendura në ligjin nr. 115/2016 janë të një natyre orientuese, dhe për shkak të ndryshme të përligjura që nuk respektojnë afatin, organi mund të vendose pranimin e tyre edhe me një vonesë të arsyeshme, për sa kohë as ligji nuk parashikon pasojën.

Së treti: Në rastin tim kjo vonesë pa dashje, nuk ka penguar punën e ILDKP-së, pasi unë dhe bashkëshortja ime, gjyqtare, kemi deklaruar çdo vit, për shkak të pozicioneve zyrtare, përfshi edhe deklaramentimin për shkak të vettingut. Unë, me plotësimin e formularëve të pasurisë, nuk kam bërë gjë tjetër veçse kam shtuar gjendjen e pasurisë këto dy vitet e fundit dhe të tjerat janë identike si në deklaramentet e mëparshme pranë ILDKP-së.

Sa më sipër lutem të merrni në konsideratë këtë kërkesë dhe të udhëzoni institucionin e ILDKPKI-së në marrjen në dorëzim dokumentacionit, të cilin unë e kam dërguar nëpërmjet shërbimit postar në datën 30.04.2019.

16. Pas kryerjes së veprimeve procedurale të sipërcituara, në zbatim të shkronjës "dh" të pikës 1 të nenit 7/a të Ligjit nr. 8577/2000 dhe të pikës 4 të nenit 235 të Ligjit nr. 115/2016, si edhe të pikave 30 dhe 76 të Vendimit të Këshillit të Emërimeve në Drejtësi nr. 4 datë 11.03.2019 "Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë", anëtari i Këshillit relator për ndjekjen e procedurave për vendin vakant në Gjykatën Kushtetuese të shpallur nga Presidenti i Republikës në datën 07.02.2018, ka përgatitur relacionin mbi gjendjen e faktit dhe të ligjit të zbatueshëm për sa i përket procedurës së verifikimit të pasurisë lidhur me kandidatin Theodhori Sollaku dhe në datën 13.05.2019 e ka dërguar çështjen për shqyrtim në mbledhjen e Këshillit.

17. Në zbatim të pikës 33 të Vendimit të Këshillit të Emërimeve në Drejtësi nr. 4 datë 11.03.2019 "Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë", Kryetari ka thirrur mbledhjen e Këshillit duke njoftuar anëtarët për zhvillimin e saj në datën 14.05.2019, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë edhe çështja me objekt përfundimin e procedurës së verifikimit, vlerësimit, pikëzimit dhe renditjes së kandidaturës të zotit Theodhori Sollaku, për shkak të tërheqjes nga kandidimi për vendin vakant për gjyqtar në Gjykatën Kushtetuese, të shpallur nga Presidenti i Republikës, në datën 07.02.2018.

18. I njëjti njoftim, së bashku me materialet e çështjes i janë dërguar edhe Avokatit të Popullit.

19. Për zhvillimin e mbledhjes së Këshillit në datën 14.05.2019 dhe rendin e ditës janë njoftuar edhe subjektet që sipas ligjit ftohen të marrin pjesë në mbledhjet e Këshillit.

20. Po në datën 14.05.2019, përpara kohës së zhvillimit të mbledhjes së Këshillit, kandidati Theodhori Sollaku ka dërguar njoftim në adresën zyrtare të komunikimit me Këshillin keshilli2@ked.gov.al, me të cilën bën me dije se:

".....shfaqja interes për të kandiduar për anëtar të Gjykatës Kushtetuese si dhe plotësova gjithë dokumentacionin e kërkuar nga ana juaj. Por me një vendimmarrje të Kryeinspektorit të ILDKPKI-së, e cila në vlerësimin tim është jo ligjore, nuk u morr ne konsiderate kontrolli i pasurisë për shkak të mosdorëzimit të formularëve të pasurisë brenda afatit 15 ditor. Argumentat e kundërshtimit tim jua kam dërguar me një letër drejtuar KED-së.

Por duke parë që nga ana juaj nuk pati reflektim, me keqardhje po ju deklaroj tërheqjen nga kandidimi për të gjitha vendet ku unë kam shfaqur interes për anëtar të Gjykatës Kushtetuese, nëse nga ana juaj do të quhet i drejtë qëndrimi i Kryeinspektorit."

21. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e Avokatit të Popullit lidhur me mënyrën e procedimit të ndjekur për verifikimin e kandidatit.

22. Në thelb, Avokati i Popullit parashtroi se nuk vëren parregullsi në procedurat e ndjekura deri më tani për verifikim e kandidaturës. Lidhur me njoftimin e qëndrimit përfundimtar të kandidatit për konfirmimin e interesit për kandidim, por që në kushtet e mospranimin të Deklaratës nga ILDKPKI sepse ishte paraqitur jashtë afatit ligjor 15 ditor dhe të një qëndrimi të njëjtë që mban edhe Këshilli deklaroi tërheqjen nga kandidimi në të gjitha vendet vakante, të mbahet parasysh se pika 2 e nenit 235 të Ligjit nr. 115/2016 ka përcaktuar shprehimisht detyrimin e kandidatëve që Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë ta dorëzojnë të plotësuar pranë ILDKPKI "jo më vonë se 15 ditë nga marrja pranë Këshillit të formularëve për deklarimin e pasurisë". Ligji nuk i njeh as ILDKPKI dhe as Këshillit kompetenca për të zgatur afatin 15 ditor. Vullneti alternativ i kandidatit për tërheqje nga kandidimet nëse Këshilli do të vlerësojë e vendosë që nuk ka vend për udhëzuar ILDKPKI të marrë në dorëzim Deklaratën e Pasurisë së dërguar me postë, është i qartë dhe i shprehur rregullisht.

II. Vlerësimi i Këshillit të Emërimeve në Drejtësi

23. Këshilli i Emërimeve në Drejtësi, duke pasur parasysh dispozitat ligjore dhe ato nënligjore normative të sipërcituara, bazuar në relacionin dhe aktet e dërguara nga anëtari i Këshillit relator i caktuar për ndjekjen e procedurave për vendin vakant në Gjykatën Kushtetuese të shpallur nga Presidenti i Republikës, në datën 07.02.2018, si edhe në vetë formën alternative të shprehjes së vullnetit nga kandidati në shqyrtim lidhur me kandidaturat e tij, vlerëson se duhet të procedojë me vendim për përfundimin e procedurës së verifikimit, vlerësimit, pikëzimit dhe renditjes së kandidatit Theodhori Sollaku.

24. Në pikën 1 dhe 2 të nenit 7/c të Ligjit nr. 8577/2000 parashikohet se për plotësimin e vendeve vakante që krijohen në Gjykatën Kushtetuese, Kuvendi:

"1. ..., shpall në faqen zyrtare të internetit hapjen e procedurës së aplikimit. Pranë Kuvendit paraqiten aplikimet e kandidatëve të shoqëruara me dokumentet që vërtetojnë përmbushjen e kushteve dhe kriterëve të përcaktuara në nenin 7/a të këtij ligji.

2. Kuvendi, brenda 30 ditëve nga hapja e procedurës së aplikimit, publikon listën e kandidatëve dhe ia dërgon ato Këshillit të Emërimeve në Drejtësi".

25. Në zbatim të nenit 7/c të Ligjit nr. 8577/2000 dhe të nenit 234 e vijues të Ligjit nr. 115/2016, pas dërgimit të listës së kandidatëve që kanë shprehur interes së bashku me dokumentacionin e paraqitur, për vendin vakant në Gjykatën Kushtetuese të shpallur nga Presidenti i Republikës, në datën 07.02.2018, Këshilli i Emërimeve në Drejtësi ka filluar në datën 05.04.2019 procedurën e verifikimit të kandidaturave për plotësimin e kushteve dhe kriterëve të kandidimit që parashikohen nga Kushtetuta dhe ligji.

26. Ligji nr. 8577/2000 dhe Ligji nr. 115/2016 nuk parashikojnë në mënyrë të shprehur rastin e tërheqjes nga kandidimi dhe mënyrën e disponimit të Këshillit të Emërimeve në Drejtësi në raste të tilla.

27. Por, nga ana tjetër, Ligji nr. 115/2016, në pikën 2 të nenit 229, parashikon se :

“2. Këshilli i Emërimeve në Drejtësi, për të siguruar zhvillimin e një procedure transparente, publike dhe bazuar në merita, me vendim, miraton rregulla më të detajuara për përzgjedhjen dhe pikëzimin e kandidatëve, duke përfshirë edhe rregullat për procedurën e verifikimit të pasurisë, integritetit dhe të së shkuarës profesionale dhe personale të tyre.”.

28. Bazuar në këtë detyrim dhe delegim ligjor për të miratuar, në bazë dhe për zbatim të ligjit, rregulla më të detajuara normative, Këshilli i Emërimeve në Drejtësi ka nxjerrë aktin nënligjor normativ, vendimin nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”.*

29. Në lidhje me rastin e tërheqjes nga kandidimi, në vendimin nr. 4 datë 11.03.2019 të Këshillit të Emërimeve në Drejtësi, në pikat 8 dhe 31 të tij, parashikohet se :

“8. Kandidati ka të drejtë të tërhiqet në çdo kohë nga kandidimi, duke e njoftuar me shkrim Këshillin. Pas këtij njoftimi, Këshilli vendos menjëherë përfundimin e procedurës së verifikimit të kandidatit. Akti i Këshillit për konstatimin e tërheqjes nga kandidimi i njoftohet menjëherë kandidatit dhe bëhet publik në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.”.

“31. Kur kandidati njofton tërheqjen nga kandidimi, relatori përgatit relacionin që përshkruan procedurën e zhvilluar dhe projektaktin mbi përfundimin e procedurës administrative të verifikimit të kandidatit të tërhequr, duke e dërguar menjëherë për shqyrtim në mbledhjen e Këshillit.”.

30. Këshilli i Emërimeve në Drejtësi, në zbatim të drejtë të dispozitave ligjore dhe atyre nënligjore normative të zbatueshme në rastin e tërheqjes nga kandidimi, vlerëson të rregullt procedurën e ndjekur deri tani për verifikimin e kandidaturës së kandidatit Theodhori Sollaku. Kandidati është njoftuar rregullisht për fillimin e kësaj procedure, në rrugë elektronike në datë 05.04.2019 dhe nuk është paraqitur.

31. Gjithashtu, nga aktet që përmban dosja e kandidimit, rezulton që kandidati Theodhori Sollaku, në datën 14.05.2019, përpara mbledhjes së Këshillit, ka dërguar në rrugë elektronike në adresën keshilli2@ked.gov.al, një shkresë që gjendet e depozituar në dosjen e kandidatit, me anë të së cilës bën me dije se:

“...shfaqja interes për të kandiduar për anëtar të Gjykatës Kushtetuese si dhe plotësova gjithë dokumentacionin e kërkuar nga ana juaj. Por me një vendimmarrje të Kryeinspektorit të ILDKPKI-së, e cila në vlerësimin tim është jo ligjore, nuk u morr ne konsiderate kontrolli i pasurisë për shkak të mosdorëzimit të formularëve të pasurisë brenda afatit 15 ditor. Argumentat e kundërshtimit tim jua kam dërguar me një letër drejtuar KED-së.”.

Por duke parë që nga ana juaj nuk pati reflektim, me keqardhje po ju deklaroj tërheqjen nga kandidimi për të gjitha vendet ku unë kam shfaqur interes për anëtar

32. Në lidhje me shpjegimet dhe kërkimet alternative të sipërcituara të kandidatit Theodhori Sollaku, Këshilli vlerëson të evidentojë se, në pikën 2 të nenit 235 të ligjit nr.115/2016, parashikohet qartë se:

“2. Jo më vonë se 15 ditë nga marrja e formularëve për deklarimin e pasurive dhe të interesave financiarë, kandidatët i dorëzojnë ato të plotësuara pranë Inspektoratit të Lartë për Deklarimin dhe Kontrollin e Pasurive dhe Konfliktit të Interesave.....”

33. Kjo dispozitë dhe ligji nr. 115/2016 në tërësi nuk parashikon raste përjashtimore dhe as edhe mundësi për zgjatje afati përtej atij 15 ditor, as edhe nuk i jep ILDKPKI ndonjë kompetencë për të vlerësuar zgjatje apo pranim të Deklaratës përtej këtij afati ligjor.

Gjithashtu, kjo dispozitë dhe ligji nr. 115/2016 në tërësi nuk i caktojnë Këshillit të Emërimeve në Drejtësi kompetenca që të ndërhyjë në ushtrimin e kompetencave të organeve të tjera të ngarkuara me detyrime kontrolli e verifikimi, sikurse është edhe ILDKPKI, sikurse edhe që të vlerësojë dhe urdhërojë këto organe të pranojnë kryerjen e veprimeve kontrolluese përtej afateve që i cakton vetë ligji.

34. Këshilli i Emërimeve në Drejtësi ka vetëm kompetencën që, për pjesën e veprimeve të procedurës së verifikimit që kryhen dhe administrohen nga vetë Këshilli, të vlerësojë rast pas rasti, në varësi të motive që parashtron kandidati, për ti dhënë ose jo afate të reja për plotësimin e detyrimeve që caktohen nga ligji ose aktet normative të Këshillit, sikurse është edhe vendimi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*.

35. Duke pasur parasysh sa arsyetohet më sipër për ligjin e zbatueshëm dhe interpretimin e tij, si edhe parashtrimin përfundimtar alternativ të shpjegimeve dhe qëndrimit të kandidatit Theodhori Sollaku, Këshilli vlerëson të rregullt në aspektin e qartësisë së vullnetit të shprehur nga ky kandidat në shkresën e sipërcituar drejtuar Këshillit, për tërheqjen nga kandidimi në rast se Këshilli nuk do të vlerësonte të udhëzonte ILDKPKI të pranonte për shqyrtim Deklaratën e Pasurisë që ishte dërguar pranë atij institucione edhe pse jashtë afatit ligjor 15 ditor.

36. Sikurse arsyetohet më sipër në këtë Vendim, Këshilli nuk e ka kompetencën të shtyjë a caktojë afat të ri, përtej atij 15 ditor të caktuar shprehimisht nga ligji, që kandidatët të paraqesin dhe depozitojnë Deklaratën së Pasurisë pranë ILDKPKI, as edhe kompetencës të urdhërojë a udhëzojë këtë institucion për të pranuar deklaratimet e pasurisë së kandidatëve. Prandaj, ky Këshill mban parasysh vullnetin e qartë të shprehur nga kandidati për tërheqjen nga kandidimi në rast se nuk gjendet mundësi për ti dhënë një afat të ri për plotësimin dhe dorëzimin e kësaj Deklarate në ILDKPKI.

37. Këshilli vlerëson që shprehja e interesit dhe kandidimi për plotësimin e vendeve vakante që krijohen në Gjykatën Kushtetuese është një e drejtë, e cila ushtrohet nga kandidatët ekskluzivisht mbi vullnetin individual të tyre, duke respektuar procedurat, kushtet dhe kriteret e kandidimit që parashikon Kushtetuta dhe ligji.

38. Në rast se personi që kandidon, në çdo kohë e gjendje të procedimit, shpreh vullnetin për të mos vijuar më tej me kandidimin për plotësimin e vendit vakant që krijohet në Gjykatën Kushtetuese, atëherë nuk ka më vend të vijojnë procedurat e verifikimit, vlerësimit, pikëzimit dhe renditjes së kandidaturës, të parashikuara nga ligji dhe aktet nënligjore të nxjerra në bazë e për zbatim të tyre.

PËR KËTO ARSYE:

Në mbështetje të pikës 1 të nenit 149/d të Kushtetutës, të pikës 2 dhe 3 të nenit 229 të Ligjit nr. 115/2016 “Për organet e qeverisjes së sistemit të drejtësisë”, si edhe të pikave 8 dhe 31 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

VENDOSI:

1. Përfundimin e procedurës së verifikimit, vlerësimit, pikëzimit dhe renditjes së kandidaturës të zotit Theodhori Sollaku, për shkak të tërheqjes nga kandidimi për vendin vakant për gjyqtar në Gjykatën Kushtetuese, të shpallur nga Presidenti i Republikës, në datën 07.02.2018.
2. Në zbatim të nenit 238 të Ligjit nr. 115/2016, ky vendim i njoftohet kandidatit Theodhori Sollaku.
3. Kandidati Theodhori Sollaku ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

KRYETARI,

Ardian DVORANI

